

## Le nom

En innu, il y a beaucoup de noms mais pas autant qu'il y a de verbes. Voici un texte tiré du livre *Tanite nene etutamin nitassi?*/Qu'as-tu fait de mon pays?, d'An Antane Kapesh.



### Un peu de lecture

An Antane Kapesh, *Tanite nene etutamin nitassi?* ICEM, 2004. p. 8-9.

Mishta-shashish, **tshishennu** tapan anite minashkuat. Mishta-uinipishiu mak **ussima** kanuenimeu. Iapit nenua **ussima** uinipishinua.

Ne **tshishennu**, anite etat minashkuat e peikussit, nenu eshinniut mishkatenitakushu eshpish innishit. Apu tshekuannu nutepanit, mishta-minupu. **Utassi** mishta-minuashinu kie mishta-mishanu, **ushipima** mitshetuait anite **uinipekut** ut uauinupannua. Kie anite etat minashkuat, uin e peikussit pakassitishu.

Anite etat apu tshekuannu nitautshitat. **Mitshiminu** apu nitautshitat kie **minisha** apu nitautshitat. Mitshetuait eishinakushiniti **aueshisha** tanua, **namesha** kie, mitshetuait anite **shakaikanissit** kie **shipit** tanua. Kie nenua **minisha** mitshetuait eishinakuanniti kassinu anite nitautshinnua shetshen. Eukuannu nenu muk<sup>u</sup> eshi-pakassiut kie tapue minuinnuat ashit **ussima**, nanitam **ussi-mitshiminu** mitshuat. Ne **tshishennu** namaienu **shunianu** eshi-pakassiut. Apu nishtuapatak **shunianu** usham apu nita uapatak. Mishkut tapue nenu **utassi** nanitam uashkamanu.

Anite etat minashkuat apu tshekuannu anite takuannit tshetshi matshi-natukunikatakut. Iakushiti, uin uetshit natukuitishu. Anite assit ekute uet utinak tshekuannu tshe natukuitishuatshet. Kie nenua passe **aueshisha** ka taniti **utassit** iapit anite ut mishkam<sup>u</sup> e minuanit **natukunnu**.

Ne **tshishennu** kassinu eishinakushiniti **aueshisha** ka ut inniut, kassinu nenua mishta-ishpitenimeu. Apu nita metuatshtet kie apu nita nipaiat shetshen peik<sup>u</sup> eshinakushiniti **aueshisha**. **Assinu** iapit ishpenitam<sup>u</sup> : **nipinu**, **ashininu**, **nekanu**, kassinu eshi-takuannit anite **assit**. **Mishtikua** apu nita tshimikauat shetshen. **Utshua**, **shipua**, **shakaikanissa**, **shipissa**, uin nenu kassinu uauitam<sup>u</sup> tshe ishinikateniti. Kie nenua **ussima** **utishinikashunnu**, uin nenu mineu.

Nenua **ussima** kenuenimat mishta-shuenimeu kie mamitunenimeu nete nikan. Kassinu tshekuannu tshishkutamueu e natauti, uitsheueu kie nanitam tipatshimushtueu anite utat **tipatshimunnu**, miam **utauia** kie **umushuma** **utipatshimunnu**. Kie uetakussiniti eshk<sup>u</sup> eka nipaniti, **ussima** nanitam pitama atanukueu. Ne **auass** nanikutini puamu. Ueniti tshietshishepaushiniti ekue tipatshimushtuat **umushuma** ka ishi-puamut. Ne **tshishennu** uin ekue uitamuat **ussima** essishuemakannit nenu **upuamunnu**. Kie ne **auass** nanitam tapueu peuamuti.

Ne **tshishennu** nenu **assinu** nutim eshpishanit kassinu nete aitutaieu nenua **ussima** tshetshi minu-nishtuapataminiti. Anite etat minashkuat, apu auennua mamashiat kie apu auennua mamashikut. Uiapamati auennua, eukuannua muk<sup>u</sup> **aueshisha** uiapamat mak pietaki tshekuannu, eukuannua muk<sup>u</sup> **uishkatshana** pietuat e tatuataminiti anite uashka **uitshit**